



屠太史蘭暉堂集序

蘭暉堂集序

無錫

中順大夫詹事府少詹事兼翰林院

侍讀學士

南京國子祭酒

經筵講官同修

國史

玉牒

秦泉黃佐撰

國史館藏

聖皇在宥昭乎上玄降釐錫羨史不絕書天符人

瑞實相表裏乃者巳亥之春有

詔慎選宮僚遂

招駿茂徠岩穴奮羽儀恪位著朱芾相先紳掖舉

集翼翼鏘鏘如也是時予叨以春坊司諫起自荒

遜始獲交諭德漸山屠子晨夕挹其龍光覲厥鳧

藻蓋有受三益而錫百朋者矣漸山諱應峻字文  
升平湖甲族尚書康僖公之子丙戌第進士被選  
讀書翰林當授史官輒泄郎署居無何聲實著聞  
復入翰林爲 殿讀翊善 簡在途晉今官其有  
辭以名世也實不勞而成焉家積縹緗侈於鄴侯  
雖石室之秘羽陵之藏莫之過也二昆繩武甲科  
世爲大夫而漸山英穎天出凡奧渫之編聳牙之  
牘一經其目悉自得之故學不待閉門距躍而自  
顯攻文不待蒐羅綴緝而自充遠語曰勤揭厲以

涉大川不如輕舟之逸也披砂礫以求簡珠不如  
武庫之富也何則成之不勞由蓄之有素焉爾自  
予觀之序解以贈述則神應無方碑記以鋪張則  
精能惟覈疏表以敷奏則情貢忠曲書說以酬酢  
則動攝會機誌銘以昭存則緒貫幽明傳狀以闡  
德則裁周志節隨其所至而體要備矣矧夫有道  
之隆微言不革無私之照至曠不遺是以修詞麗  
西京直筆媿南董率廸人紀駿發天經於歸養見  
匪躬之節焉於凱雅見允塞之猷焉於述諫見蹇

諤之風焉於鳴楸見才用之愆焉於雷解見仁愛  
之徵焉於說弓見財勇之撓焉於讓陸見寵利之  
釁焉於議薛見道真之難焉正誼發乎構思浩氣  
動乎操觚卓識烈于秋陽危言皎乎金鏡是皆脂  
韋渙忍之徒望而慙焉者也抑嘗竊有聞焉仁賢  
在國不爲華而爲實休祥在治不以物而以文是  
故商實非他也命之純祐者也周禎非他也典之  
緝熙者也摛藻詣精雖爲末藝而衷誠著焉彛憲  
具焉美則愛愛則傳者尚在茲哉屠子旣沒其嗣  
進士仲律刻集以傳而門生侍御蕭友山代巡吾  
廣俾予爲序顧予牾謬敢辱羣言之首哉然禮有  
前輕竊取乘葦之義則亦不得而辭矣詩不云乎  
雖有絲麻無棄菅蒯此之謂也

嘉靖三十一年壬子孟夏旣望男仲律刻

萬曆四十三年乙卯孟春望會孫男繩德重刻

附錄

墓誌銘

長沙張治撰

嘉靖丙午正月十有三日右諭德漸山屠公卒於家公之未卒也夢遊衡山衡山君揖而進焉見兩廡大署曰卒明年正月十三及卒之日果與夢符噫異哉大鈞播化游靈鳩萃以資人賢升縮消聚固有物以宰之耶余往在史局及戊戌奉命校武舉皆與公俱暇嘗探古作者之論擬正治亂興衰之故公直豁已臆奮然以拯世扶物爲任而隄

障初終決度當否若繩裁刃解然未始不撥勵治  
本幅緇仁義鈎致於經史解禦於理化也 天子  
大狩承天雋臣走扈從余復與公俱馳驅甲馬中  
夜聞聲縱縱車轂擊逐彼此驚失僕夫互相呼移  
時乃合冒風雨投宿民舍據木几對談終夕或枵  
腹馳數十里憊臥沙際然余寢食公亦寢食凡訛  
止必使人伺焉歷四三旬不少懈古有所謂託死  
生之義者公非其人邪旣公得竒疾疏歸平湖余  
猶冀公之復來也迺遽若此已哉噫嘻嗟嗟悲乎

悲乎公子孟玄以書來乞銘余讀之不覺淚簌簌  
下遂志而銘之公諱應垓字文升別號漸山先世  
陳留人南宋徙嘉之平湖始祖曾一曾一生亨一  
亨一生澤民澤民生湘湘生機機生太保康僖公  
勲康僖公六子而公最幼繼室封一品夫人牛氏  
出也初以蔭補太學生公曰大丈夫當自樹立顯  
名無窮安能藉閥恩席貴宦耶用是殫力淵學飲  
醇探嚮程猷經用噴英摘華聲隱隱起藝林嘉靖  
乙酉舉應天鄉試第二丙戌第進士選翰林院庶

吉士讀書中秘時閣臣務紛易典制諸吉士皆少年負氣不下謁閣臣遂奏出諸吉士悉改部寺乃公授刑部主事季秋囚當決者已三覆奏矣公疏請緩死 上允之得全活者二十餘人戊子歲鄉試 天子從言者議命京朝官主之江西稱大藩以公夙望特命校文焉當軸者以其子屬之曰卽第當重貴汝公退而曰國家之選士也以公而顧以私應之非求賢意一夕夢人呂醜進者公辭不受醜覆地地墳公覺曰人將醜我乎寧醜母徇吾

私以醜科目當軸子竟不第庚寅調儀制主事辛卯補員外郎壬辰陞祠祭郎中尋調儀制郎中時上方肇建 郊廟定正諸典禮公與有勞焉癸巳改翰林院修撰仍五品服乙未命同校 列聖訓錄丙申訓錄成賜白金文綺賜宴 謹身殿陞侍讀 皇太子生詔使河南諸藩王諸藩王所錫予秋毫無所受巳亥陞右春坊右諭德時 春宮初建慎簡僚家羣臣有覬倖者於是給事中御史以爲言章一再上凡所論皆罷免公獨留焉由是天

下皆以公輔望公也庚子以得請歸疾遂作壬寅  
適丁牛夫人喪公號痛猶勉力治大事疾遂大作  
至是竟弗能起焉彌天之志藉以靜寐夷世之畧  
朽有一棺噫嘻嗟悲乎悲乎人之言曰長算屈  
於短日遠跡頓於促路人如何哉天實忌之矣公  
懷竒負氣耻碌碌隨時態汨沒每聞古今竒節大  
義輒抵掌頓足躍然有凌駕之志也屬交趾不靖  
不臣貢者二十年所詔廷臣議才望者使往諭廷  
臣以余及公應詔公奮然曰人臣無橫草之功侍

講幄得奉使命當宣 天子威德揚聲萬里外不  
亦偉乎卽此可以觀其氣矣使當大任得究所施  
於天下旂常之勳寧足道哉公爲文章高騁迥厲  
旁紹曲摭變醕養醇堯醲舜薰斯有意趨賈馬劉  
班之藩墻者邪後必有能傳之者他所隱行竒節  
與夫歷履宦業忠孝友義輕財貨撫孤難勵廉扶  
危急病遜夷凡言動細小莫之具述也乃其詳則  
僉事袁君袞之狀足備之矣而余復奚言哉公生  
弘治壬戌年四十有五兄弟五人長應埴湖廣副



次應坤雲南叅政配項氏累封宜人少保襄毅  
公之孫叅政公之女也有懿德生子五孟玄太學  
生娶金氏仲律中甲辰會試娶張氏繼沈氏仲行  
府學生娶包氏叔方聘趙氏叔章聘牛氏女四長  
適富于文次適吳邦棐俱太學生次適吳繼庠生  
次許常氏孫男四孫女四孟玄將以丁未年二月  
十二日卜葬於橫山塘之原壬山丙向銘曰  
物有奇氣猶達於天而莫之或湮公氣之奇乃抱  
以潛寐而竟弗之伸耶其將散而爲景星爲慶雲

爲祥麟瑞鳳以泄其神耶抑遺其不盡之福以昌  
其後之人邪大化漠漠則又孰究其真邪噫嘻嗟  
嗟悲乎悲乎

神道碑

華亭徐階撰

屠氏其先扈宋自陳留徙嘉之平湖入國朝幾  
絕而續語在處士亨一誌中公諱應垓字文升別  
號漸山處士六世孫宮保刑部尚書贈太保謚康  
僖諱勳之子而繼夫人牛氏出也年十二三康僖  
公爲諸子論說史傳語半使逆計成敗公越對懸  
斷若素習者由是有名稍長以蔭入太學嘉靖乙  
酉舉應天鄉試第二明年舉進士改翰林庶吉士  
富是時宰相有驟起用事者謙諸翰林不附已奏

出三十餘人已又怒諸吉士曰是固嘗遭我於道不避騎者盡奏出爲部寺屬而公得刑部主事方宰相之出諸翰林也予以服除新起得不在遣中嘗過視諸吉士或不能無少愠公獨怡然也故事歲季秋當論囚奏已下矣公覺其中有寃上疏請緩刑詔報可于是寃者得不殺戊子校文江西大臣子或走數千里歸就試公斥去不錄大臣怒思有以中公會其人罷去庚寅公遂調儀制主事踰年進員外郎又踰年遷祠祭郎中改儀制郎中而

向之噤予者固在予竟坐言事出爲延平推官癸巳今宰相夏公以爲天子方重文學侍從之臣翰林諸先輩無在者而公才任翰林薦以爲修撰仍五品服自近世來翰林諸縉紳率以文詞相雄誇至於世務一切置不論惟公不謂然故與人語往往先人才風俗錢穀甲兵及政之所宜罷行者方其意得時馳騁古今率數千言不倦也丙申校寶訓實錄成天子若曰昔我皇祖高皇嘗宴儒臣文華之殿今予思繼承先志而二三臣以訓

錄實來宴 謹身其可宴畢 賜白金文綺遷侍  
讀克 經筵講官儒者爲榮戊戌同考會試未幾  
主武舉考 天子將討於安南 詔廷臣舉可往  
諭者以今吏侍龍湖張公暨公名上其後不果遣  
使而論者則曰使公往其或可不煩兵已亥始建  
儲官遷右春坊右諭德兼侍讀會諸官僚或自他  
途以進於是給事中御史疏論十有八人而公亦  
在論中章一再上 天子盡去十七人者獨留公  
二公素負氣旣橫被口語忿不能自持疾大作及

獨被留益思有以自明亦三上書以去請其秋予  
自江西提學副使召爲司經洗馬數往留不得則  
謂曰疾已其速來公不應歸一年疾增劇又六年  
遂卒壽四十五耳吁可傷也配項氏累封宜人子  
男五孟玄太學生仲律甲辰會試中式仲行府學  
生叔方叔章尚幼女四長適富于文次適吳邦棊  
並太學生次適吳繼庠生次許嫁常氏孫男女各  
四公且以丁未年二月十二日塋於橫山塘之新  
塋仲律與其兄以公遺命來請銘神道之碑初公

生康僖公筮之得震之漸曰鸞德如玉飛上高木  
鼓其羽翼光照四國及歲乙巳公夢謁衡山君有  
書在廡間曰卒明年正月十三官至二品增壽一  
紀晨語諸子曰吾殆將死也夫吾起家六品歷二  
十年而官不踰五品夢所謂二品者此也曰增紀  
者易歲之云也吾殆將死也夫比卒其年與月日  
皆是予既已傷公又感公之所以生且死乃爲銘  
其詞曰

嗚呼屠公始孰生之筮告之故卒孰爲之夢示

之數謂筮信耶其光未融謂夢誣耶及期以終  
筮吉不酬夢妖而踐嗚呼天哉殲此邦彥

墓誌銘

四明沈一貫撰

嘉靖中稱明德而顯於世又扼於數不究達者爲  
漸山先生先生卒又四十二年而其配項宜人乃  
卒一顯於仲子律再顯於叔子方與其孫謙而昌  
融熾鑠之業益隆隆起宜人之陶鑄萬端有功於  
屠甚大不佞益與孫謙同舉聞其槩又二十年而  
讀其子侍御君狀是名德之配也大邦之媛也駢  
祉之所集而永胙之所招也雖辭不敏其能忘銘  
按狀宜人姓項氏嬪於屠屠項皆樵李聞族項之

六以大司馬襄毅公而屠以大司寇康僖公兩家  
至相映也宜人襄毅孫參政怡菴公子母田恭人  
其嬪諭德先生則康僖嫡子也天與莊靈通女史  
列傳大義甫十三母恭人卒哀如成人參政公欲  
不娶宜人曰烏有卹女孤而鰥其父者乎逮繼母  
歸悉出其母藏不私二十而適諭德公諭德公纔  
志學耳而康僖捐館時庶兄已貴家衆壘立觀望  
宜人晒於大幾慈潤遇事無所凝滯內外斬然事  
姑太夫人唯志是承雖所使媵婢無失其權嘗遵

疾醫禱罔功宜人割股和羹以進病良已又以其  
間佐公讀篝燈拂几手機杼而襄之成進士衡驚  
於秘館不呂家爲皆用宜人能婦也公旣文益有  
聲戊子以刑部主事典試江西宜人奉太夫人歸  
事竣太夫人安於家不欲行宜人謂公曰聞以外  
君爲政其內我且代君君無傷姑之志哉特買一  
妾膏沐之以見于公曰燕中遙夜差慰寂寥其婉  
至之致具蘭暉堂集中後五年公省覲歸宜人字  
側室女若已女也旣復從北上以禮部郎秩滿受

今封諭德公既受 特知改翰林修撰侍讀進宮  
諭校讐重典所交傾海內士而尤與關中趙景仁  
江右羅達夫吳袁永之唐應德善騎從還往宜人  
從中治修髓醴醢以佐驩而自所儲廼最下具躬  
節而與仁類如此辛丑公念太夫人老謁歸而太  
夫人竟逝所以相公大事者志物逾力而止又明  
年公亦蚤世宜人數求從不得撫其孤慟曰吾不  
得吾君矣吾得吾君之志以授汝則櫝經史而督  
之誦曰此而父所夙習也間語以祖德宗范曰此

而父所雅言也指其素所劬育而媵御者曰此而  
父所阜成也未辯色而起臧獲次署夕則攷其成  
與諸子計瞻誦與諸婦計組紉其程能不同而扶  
墮均以是屠之宗日起其胤子日顯而人謂宜人  
能母庚戌仲子律令弋陽教以居官蒞衆之法甲  
寅倭難作仲時爲侍御迎宜人於留都寇平徙郡  
城已仲卒于官宜人哭之慟拾其橐歎曰無忝父  
矣獨憾其去我先耳隆慶戊辰萬曆丁丑孫謙叔  
子方後先成進士當六十稱慶子孫媼連綵錯於



庭婦女媵庶珠玉金翠闐于室顧獨念姑老不逮  
養夫子蚤世不怡也丙戌叔子按行南畿見宜人  
病欲留宜人曰汝以一老婦抗君臣之義謂國恩  
何而宜人病且劇祈解百方不任治卒是爲丁亥  
之獻歲也蓋宜人知其日起視諸子談生平甚具  
以風示無忘而後登假暇矣宜人人家世鼎貴而閑  
於治家習然哉然其婉嫕恭孝天性篤至又非以  
習故嘗試諸子言母務華母邇諛母難踐臧獲有  
過卽不可揜必再三誨令改而後已爲季子買宅

郭門外直數十百楹參成而中變衆議臧直宜人  
不可曰彼以貧故鬻產寇而臧其直是滋貧也嘗  
見食言而肥者耶有嫠婦乞衣心許之矣月餘不  
更來則凡物故製衣貽其家曰不負言吳俗好媚  
鬼而宜人獨不里婦之壽張者莫敢窺其閭晚益  
恬澹危坐一榻足不闔者二十年疾則召其女嘗  
曰汝嫺事而適於志庶善吾終爾屬續之日屏侍  
人獨富孺人與二女浴襲帷而後見外可謂生死  
由禮矣宜人旣歿股以療姑而身病孫大壯亦復

到股進宜人事母順而吳恭人不解髡侍疾卒死  
孀宜人孀友儉慈有樛木恩而死之日體所遺者  
八十五人享年九十有一子姓封君一侍御二督  
學副使一鄉舉二諸嶽嶽頭角不可量也語曰子  
孫視汝雷復其處信哉五子孟玄封南京兵部員  
外郎娶金氏繼金氏仲律直隸廬州府知府娶張  
氏繼沈氏仲行監生娶包氏叔方監察御史娶趙  
氏叔章監生娶牛氏女四一適光祿富于文一適  
監生吳邦棊一適尋甸府知府吳繼一適常繼璿

孫男十有九人謙山東按察司提學副使娶沈氏  
繼錢氏同生員娶陶氏蒙舉人娶賈氏願監生娶  
吳氏泰生員娶周氏繼沈氏夷娶趙氏復初生員  
娶范氏履祥生員娶卜氏繼趙氏臨社監生娶鍾  
氏大壯舉人娶周氏繼吳氏豫禎監生娶范氏中  
孚聘黃氏觀生員娶張氏慶孫聘袁氏壽孫聘計  
氏兌聘李氏益祚聘夏氏隨裕聘吳氏豐未聘孫  
女二十一人一適生員胡白一適生員卜日蒙一  
適舉人吳志道一適監生項德裕一適生員張世

臣一適生員陸鳴鳳一適生員茅明徵一適生員  
朱應箕一適周道一適監生孫成紀一適曹如璋  
一適趙志宏一適生員卜日又一適監生陸基恕  
一適諸瀛甫一適舉人懷所學一適監生包文炯  
一適進士項德楨一適監生包世熙一許聘范洪  
台一許聘陶元彬曾孫男十七人來孫生員娶沈  
氏次孫生員娶金氏啓孫聘劉氏官孫娶沈氏喬  
孫生員聘卜氏景孫襄孫獻孫承孫橙孫元侯佑  
孫繩德維德僖孫瑋孫蘭孫曾孫女十八人一適

監生周應愿一適工部主事黃承玄一適生員王  
淵一適生員洪世基餘幼玄孫女二人諸子卜以  
戊子年正月朔日啓諭德公壙而合沈一貫曰余  
觀古之大其宗者罔不繇內德焉關雎葛覃爲風  
始有意哉屠宜人崇徽迪懿鍾集景福前有承後  
有繼圓流方折珠璣生焉豈天復借是以報康僖  
漸山之烈也爲德母誌余何媿銘曰

天不秘瑞寶發明地不秘圖嘉禾呈天地秘發元  
媪生孳黃孕玄殷平平是爲屠姒項娥英有斧而

封式其塋

太史屠漸山文集卷之一目錄

太史屠漸山文集卷之一目錄

四言

孝思 十一章

樂章

迎神

初獻

亞獻

終獻

撤饌

送神

頌

李侯頌 有序

賦

介福堂賦 有序

秋懷賦 有序

陽峰書院賦 有序

文鳳篇 有序

五言古詩

譚節婦詩

贈袁子永之戍湖州 三首

苦雨擬張協

贈內 二首

內荅 二首

送倫彥式司成

春遊懷友人

霸陵篇

送董子元南歸兼訊袁兄永之

七言古詩

高陽行 有序

祥麟篇

君不見贈錢汝載

壽兄歌

西虹草堂歌

武夷吟

送林愈憲汝兩兵備潁州

太乙壇歌

贈張參軍

送同年唐子鎮削籍還雲川歌

送友人之蒼梧

送郭寅仲節推太原

送院長華二子潛歸覲

贈吳山人擴

馬上贈武舉生金寶

至日憇東平飲趙二元實舍席上贈長句

歌風臺

上之回

五言律詩

贈傅封君

送閻公甫太守赴保定

雪後高子業約登毘盧閣不起

寄內弟黃韶孚

夜

送陳約之謁祀 孝陵三首

夏日 捷至奉寄總制唐相公三首

送陳給事使琉球三首

寄題孫氏園亭次馬編脩韻 三首

秋日宴馬都尉第

訪念上人 不遇畱贈

送同年謝子儒致仕歸蜀 二首

春日謝人惠扇

秋日城樓餞王主事時魁

夜遊城西寺懷陳編脩約之王吏部道思

趙武庫元實移居賦得堂字

駕詣南郊 二首

大 門候駕 二首

西園

甘露寺次韻

戚懷王輓歌四首應制

送唐生

宿唐安禪林

道雪 二首

寄胡太常經

七言律詩

春陰

花朝後雪柬友

漫興

鏡光閣雨

雨晴又作

駕詣 泰神殿禮成屬雪至 二首

伏日移居

春晚過諸一丈留贈



寄趙景仁

喜雨次韻

聞南太廟災二首

病起二首

朝陵

經筵日值初度有述

九日早登城樓

暮歸登西樓再賦

病中柬張郎中臬

簡金侍御敷華訪密雲赤肚仙人

大駕朝陵

駕幸西山

駕幸九龍池

駕登十八道嶺

遊城東觀

寄張揮使淮

題張學士仰宸樓

奉和嚴相公居守京城巡門作

送蘇侍御謫宦灤州

燕邵氏園亭賦贈

王侍御瑛招登崇文城樓有作

齋宿院署

二首

登太白樓

寄呂水部

渡江望金陵與盧職方同賦

曉發移封過飲張戶曹官舍

奉和宗伯嚴相公元旦  
賜光祿酒饌恭紀

一首并次來韻

再和嚴相公  
詔賜正廬有作次韻

春日過瀛海公第有感

懷趙景仁唐應德二翰長

夜懷趙二元實

贈松江黃節推協恭

夏日送魏中丞巡撫河南

晚宿禪林明日家兄同諸公携酒相別

晚憇東平劉中丞原清招飲不赴投贈短章

晚登嶧山

投贈諸憲副揚伯

燕宗容姪湖上樓

遊金澤寺

寺中喜聞富憲副子超來訪

秋夜望泖口

上元日立春有作

目錄

曾孫男

繩德

維德

全校刻

太史屠漸山文集卷之一

屠漸山

屠漸山

四言

孝思

相國溫公之歸寧也門人屠應坡為之賦

孝思

於維孝思蒸民之則穆穆我公允迪元德綏祿辭

親中心悽惻赫赫簡書有懷靡及

我公穆穆文振厥聲 帝心簡畀秉國之鈞維王

疾舌維王股肱允烈孝思無忝所生

公拜稽首告於 天子資父事君無敢遐邇瞻望  
父矣萬里阻矣蜀山峨峨川水瀾瀾明發不寐憂  
心如烜

臣拜稽首 天高聽微維父之懷歸寧于家

天子曰都維爾輔予爾行遄歸歲以爲期母予言  
是渝母樂爾私

帝錫惟旅南金文綺維曰羞者維曰燕喜

帝命下國于峙餼糧乘馬路車以先戒行公拜稽  
首受天之慶

九月之交吉維其朝八鸞僂僂朱膺金鑣我公于  
邁綏章搖搖百辟卿士出餞于郊烹鮮包羔清酒  
百牢

於維我公吉日斯征皇皇其儀四牡不驚亦旣歸  
止其迎如雲其迎維何雍雍嘉賓其歸維何仲冬  
上旬

父居在堂公肅其躋齊齊愉愉悅且有儀嘉賓嬉  
嬉孫子祁祁坎坎伐鼓雝雝墳篋亦旣樂只萬壽  
無期

公躋於堂蹈舞將將 帝命在中於赫煌煌諸父  
昆弟紛其有行以介景福稱彼兕觥維父樂只萬  
壽無疆

我公于歸歲月逝止父曰予子行矣 帝命孔邇  
予安予樂無久視予易孝以忠毋爾遁思公拜曰  
嗟無寧父違

父曰予子行矣毋爾違息往相 天子率是常服  
公拜受命式遄其來維 天子元臣維民允懷永  
言孝思式於九圍

孝思十一章二章章八句九章章十句

樂章

迎神

於穆 武皇峻德唯神纂圖振烈錫統垂明奕奕  
新廟燁燁肇禋鸞華佇景柅鬯儲馨奉璋攸宜邇  
求厥成永思無斁 皇降居歆

初獻 武功之舞

維皇烝哉於鑠濬哲八駿業業六師孔捷南有苞  
葉覲我黃鉞既震既遏萬邦有截惟萬邦罔弗同  
耆武定功

亞獻 文德之舞

文 命明明緯武經文厲醜既平髦士攸登襄襄  
馮馮保大翊成 皇度永貞昭我德音

終獻 文德之舞

睿聖淵淵令終罔愆末命蹈宣陟配于 天烈祖  
有訓允迪其揚之眷予承服基命其康之基命斯  
皇百世熾昌駿惠無疆休有耿光

撤饌

禮樂章矣嘉薦芳矣祝辭罷禋禘告 靈饗矣告靈

既饗降福穰穰篤叙萬年壽考不忘

送神

皇神宅兮旋寢宮寢宮肅兮神有融予惠成兮穆  
皇風歆陟降兮 后惟同肇稽古今莫無窮承歲  
事兮萬祀攸隆

頌

李侯頌

李侯者關中李申也爲郡先教化去強禦  
豪民嚴鸞者誣之 朝致興詔獄然竟得  
白也后以父喪去終于家云

於昭李侯克慎厥儀肅肅愉愉維德之基民之觀  
止左右綏之亦曰歸止維以永思 維茲嘉郡蔚  
其文邦崇崇泮宮在湖之陽我侯邁之不顯其光  
有孚惠心德音孔彰 青青者衿泮宮之下於倫



維鏞坎坎擊鼓以肄百禮雍雍雅雅旣抗大侯矢  
其文武 侯曰休哉迪爾予適有民之孽敢亂恒  
德若殖嘉穀去其螟賊斤斤天刑率是常辟 民  
曰丕哉維斯戕斯孰殺彼孽吾其由之維侯之澤  
若雲垂垂迅如其雷式仁以威 彼孽誦誦胥誣  
於天師聽咸中曰維侯賢孰毀弗愠孰正而僨輯  
柔又剛肆不殞厥問 亦越大故侯歸於秦遵渚  
送之里無居人於昭李侯如玉如金下士作頌曰  
慰我民

賦

介福堂賦 有序

介福者何志 光命也少宰徐公亮若時

采簡在 帝衷得推恩所自

誥封母王氏爲太淑人有介福之褒爰構  
堂而名焉是故祿賢以逮親達孝也侈恩  
以昭德勗忠也圖永以憲后大義也于是  
應竣述而賦之其辭曰

猗斯堂之肇構兮奠吳會之名都鳩百材之豐麗

今鬱磊砢其相扶翼欄棟以高驤今肅層覆而遽  
遽挹三江之雄潤今前包山之蹲踖具區波其在  
下今雲濛濛而承楣曲瓊丹穀交方連今炳白日  
其陸離繚辛夷以爲垣今被杜蘅以爲戶汜光風  
之塵筵今自蕙蘭之瑤圃家室宗以愉樂今及母  
氏之壽考也匪聖善之貽教今伊哲人其滋起也  
宅帝揆以秉衡今踐辰機以布軌極左右而后先  
今固 皇心之攸顧曰獎孝以最忠今汝懷誠其  
予輔抑殊典之所褒今矧惟是其有母介景福以

自天兮昭大命之燁燁承 后皇之駿惠兮羗獨  
錫此嘉名煥文服其修姱兮麗翔鳳于雲冠翠翹  
頎而流珠兮珮琳琳而交鳴唯令則之宜家兮旣  
永飫于德音覲 龍光之昭回兮組纓班其相分  
斯華酌之旣羅兮摝鳴鼓于東序子孫俛而屢舞  
今奏讙讙之大呂芍藥之饌和而后陳兮繫玉食  
之有也幕瑤漿以遐薦兮唯酒人之所醕也粵繁  
錫之有恒兮抑君子之永譽衆賓娛以旣醉兮亦  
飽德而雅推進坻鄂而噉辭兮指南山以爲侶毋

欣欣其壽康今日萬年其猶未久歌曰蓀壁兮芷  
堂爛丹矐兮斯皇華采衣兮鳴琳琅紛繁會兮浩  
倡言有萱兮樹之背止有芙蓉兮山有桂芳霏霏  
兮芾芾春與秋兮未艾母壽考兮無疆載申錫兮  
天慶堂奕奕孔臧越貽翼兮垂耿光

秋懷賦

有序

陸大夫爲儀制郎中積功飭行爲天子  
所知而宰臣議階出奉閭臬僕鄙人也撫  
時卽事喟焉賦之于時秋也因以秋懷命  
篇其詞曰

何秋氣之疹蠱兮倣素律之淒淒申鳴鶴使戒露  
兮萎修蘭于枯丘叢林旖旎奄以夕勁兮游氛殞  
葉風揚埃慄慄邑邑物錯迕而就罷兮寥落是朗  
天高而日微蟬中寂又續厲兮熠燿的的而宵燔

玄鳥泝陰以辭宇兮雁卽陽而南征繫雖雖其羣  
諧兮予罔泐兮而懷友生固秋士之易哀兮感物  
化之難憑送將歸返故都兮心淹畱而自閔子捐  
故而偶新兮予怍怍其若履淵不吾知其亦奚怨  
兮竊悲夫今之人蹇余生之諒直兮弱好修以崇  
方豈唯紉蕙而佩芷兮固茹瓊而沐芳光陸離以  
周襲兮中矯厲而慨慷指前修使先導兮騶騏驥  
而服飛黃悼世俗之傾隘兮信多岐而亡羊黨機  
巧以捷步兮競詭異而改則予將持頑刃而釋堅

兮固齟齬而難入眩羊腸與九坂兮方世路其猶  
夷棘剗剗于厥心兮誘穿檻而寤歌勢軋軋而並  
轡兮剗白刃而仇之瞻岫岬以蔽目兮選峨峨其  
愉之混淆濁而伐異兮寶僞而汰真劍燃灰謂光  
于天兮指日月其不燿岱華坎其污泥兮尾閭突  
而溢山婦鬢而男則幘兮鵬一羽而巨焦明宜虎  
翼而虺足兮鷄牝晨而喑雄予雖要明月與懸黎  
兮咄黯黯而宵黜鬱額額余增欷兮子揆予之惻  
惻固鄰德而不孤兮信內美其必合車間關有兩

輪兮耕藉藉且焉偶獲子信姱以侗儻兮又重之  
以修能協神人使揆序兮 帝爰褒之曰功彼登  
佞而抑良兮陳臬事其以敷華采衣之 華華兮武  
蹲蹲于弁冠夫孰命其匪恩兮余竊疾夫衆女之  
善妬而詠淫嗟驕人信好好兮奄乘高而斃度躬  
絕命猶弗追兮澤賞讒而翼怒予謂棟且隆隆兮  
羗撫穢而得路伊霖之效尤兮奚斐斐其求索余  
將望閭闔撫神龍兮虎豹耿耿其碭突鑱鎗阿那  
以抱日兮靄砰砰而存外夫哲后豈弗寤兮孰九

死其以語彼粲春之蹇蹇兮迅隱軫而北南懷遭  
迴猶未悔兮余覲夫裕之與安豈縷數其不可殫  
兮離多難而浩歎子欣欣其遠遊兮矯九仞而降  
觀朝策馬于燕都兮夕次于魯之郊揖叔旦而質  
迂衡兮邈吐舖之上休馳汝陽且弭節兮祇神宮  
而淹留庶穆穆其猶儼兮或見聖而永由存靈光  
而慨渠渠兮喟佻舞胡以逾長太息而升降兮迫  
南征之悠悠歷豐沛而壯漢兮陟歌風之故臺唯  
從諫若轉圜兮遵后皇其弼諧閔作忠而賈怨兮

南浮江而弔鴟夷彼瓦甌鳴以爲惡今矧黃鍾之  
若雷躋會稽之隆崇今就文命而歷茲旣立立莫  
予聞今遙緘辭而徘徊躋武夷其隱天兮嶰嶠嘔  
乎獨處廓騁四望以忘憂兮遽懷余之連連伊仙  
鯉之忽恍兮具靈糈爲予占之帝赫赫卑而諒衷  
兮命掌夢使報嘉曰懋哉穀以自持兮孰險巖而  
弗崩苟執德之無爽兮般修名之馮馮余服訓而  
絕俗兮跼危而不能舍也子玉蘊以自珍兮庶求  
美而該輔也亂曰浮雲決鬱秋日曠兮鳳翔于淵  
鮑魚御兮余溘與百草同死兮胡駑駘以方驥兮  
余寧鑛鈇之刃以棄兮胡同鈛刀在室兮心結悒  
而莫從子兮荃易晰奚終懼兮

陽峰書院賦

岐陽山者荆楚之名山也學士張公構書院其上稱陽峰焉而門生屠應埃賦之

山崛岉以駢列兮勢崒岑而極天  
螭涎宛若以千里兮中后土而奠南  
雷雨窈冥猶未半兮迴日月于中  
巒接軫翼之靈膠兮赫嶒岵其若騫  
扼搯巴蜀襟帶施黔表吳會以外屏  
環襄鄧而內藩包雄楚之故都兮  
勢磅礴而逾厲踐雲夢而曳洞庭兮  
芜靖嶼猶未已凌三峽以戶闢兮  
介重湖以爲尾

並衡荆之嶠岵兮勺江漢之瀾瀾  
繁信美又吾土  
今言占良而經始儻拱材于鄢郢兮  
比岡隩以構  
宇臨沃流之瀕洞兮踰墳衍之參差  
旋楹邃以複  
結兮欒櫨疊而周施睇浮空之悅朗兮  
湖湘濯泚  
而東匝巫峽巍隸滂漾兮紛嶽蓮之倒披  
影龍蓋  
以徇雷兮蒼梧雲起而承楣虹上下以絢景兮  
霞  
爛采而涵虛郁郁芬芬敷蘭馥芸瑤草植秀珠樹  
粲英西有夏雪之嶺東睇日華之林異軌涼燠倏  
忽晦明叢篁猗猗敷野兮鳥翔集而異鳴橘垂實

以林繡兮松梧韻風而奏音爰周覽而愉懌兮  
旣  
耽思而旁訊陳圖史以玄鏡兮漱丘索之芳潤振  
大雅于鈞之野兮繩微聲于千仞騁夷軌于休廷  
兮總六轡以互進躋玉堂之奕奕兮嗣皇墳焉未  
殞持玉衡而斟酌之兮序天行之七政懷陽山之  
巖巖兮邈華宇以崆嶮遡鳴雁以寄思兮向飄颻  
之南風陽林合沓而北鷺兮偉昭烈之故宮隆丘  
翼翼其遙峙兮雲宵物而伏龍原作忠以振藻兮  
陋反騷于漢雄襲顯敞而陳賦兮啞登樓之禾工



目予逝以心軫兮峻恩錫而鴻龐予埃揖夔龍儷  
之馳兮爰反駕乎山中陟陽岡而矢歌兮聽岐鳳  
之雝雝

文鳳篇

有序

文鳳篇爲侍御聞人子壽其母王太孺人而賦也  
聞人子之視學南畿也奉母以南母時年六十有  
九矣夏六月十二日壽之日也聞人子出按崑山  
欲躬爲母壽弗可而以文屬予蓋自聞人子之爲  
侍御也歲俱壽母以文往予觀之皆出當世名公  
而予非其人也然有猶子之道焉弗可已也遂序  
而賦之俾其族子弟歌以上壽屠應峻曰君子之  
壽其親也有三道焉服德以錫愛因類以洽化俾

教流于無窮而聲稱于后世是故頌者有自而原  
始有基也壽之上也策休名被渥恩貞于身而寵  
徵于其親授無渝澤居無後愆壽之次也擇方履  
禮奉身弗辱無外榮無內憂壽之次也予之交于  
聞人子也視其于兄友也友之信也守道恪而憂  
世勤也其事 主衣榮而勗報也是有以壽其母  
也母年甫三十而寡居聞人子少也教之以道今  
成庸之朝矣 天子之遣聞人子行視學也又以  
母之所以教已者敷教于若人夫茲土也 國家

首善之地今聞人子視學將暮矣苟教之洽而成  
也則人之頌聞人子者孰不頌聞人子之母無已  
也是壽之至也吁唯聞人子之母人庶其不以予  
言爲謏也

鳳之舉兮煙冥冥御清氣兮藥立雲溘徘徊兮儀  
帝庭聲噫噫兮揚厥文秉 皇綸兮立宇光陸離  
兮南下服榮命兮修以媵繫聖善兮有壽母鳳臺  
崔嵬兮蒼蒼江淮波兮浮遠光薰風起兮華有香  
襲朱筵兮冰漿夫容紛兮曲沼蕙蘭郁兮都房華

酌羅兮賓列母欣欣兮壽康冠蓋宗兮獻酬錯鏗  
華鍾兮歌舞作豸之峩峩兮擘其光青衿繩繩兮  
禮容恪組纓班兮兩堦圮遙瞻母兮愉以樂母之  
醉兮頰醅瑱流珠兮委蛇迎西王兮瑤圃降皇英  
兮清都弭翠旂兮振霓裳悅相和兮臨風歌疏蓀  
壇兮蘭藉檮薜荔兮瑤席鸞笙沸兮玉瓚迫紛繁  
會兮娛永日壽耆悅兮尚羊永延長兮膺天慶烈  
皇皇兮節孝章振文德兮世世昌千秋萬歲兮壽  
無疆

五言古詩

譚節婦詩

落景不復返逝水無還期結髮事君子受恩良不  
貲世事易終極中道多乖離乖離在中道人生  
苦不保昔爲同心花今作斷腸草鬱陶呼蒼天淒  
淒以終老終老鬱以紆往者形不歸感君平生  
歡殺身以相隨殺身良不難存亦有所爲所爲  
亦何如秉志良不渝死者長已矣生者徒區區上  
有高堂母下復有遺孤遺孤何皃皃皃歲云

暮顧復良苦辛長立有榮輝悟彼泉下人中情迄  
于斯 于斯遯離居歲月逾五紀奄忽百歲身沉  
憂竟終始感彼栢舟篇哀吟淚如雨

贈袁子永之戍湖州

弱齡事篇翰與子諧所歡同芳拒蘭茝偶德璵與  
璠彈冠入鼎門振衣陟華軒皇心苟予顧自首諒  
無愆風波起中道行路一何難子行戍故越予留  
滯幽燕孤雲易流邁獨波不成瀾艱危各異勢繼  
悉何由宣贈子別鵠操報我以孤鸞

之子產南岳倜儻非凡才荆璞夜投人按劍忽相  
猜禍患固有期讒言啟之階秋風振林杳蒼莽晨  
光開驪駒儼在駕執手有餘哀君子敦素節在遠  
分彌諧小人實徇華居親志恒垂願保金石軀不  
以秋莫衰

清清涇水流百折猶不淄松栢有本性風雨寧瘁  
之執德苟無爽患難非所期得時騁騏驥失意爲  
龍蛇石室無銘功名山有藏書子行慎自力吾亦  
反吾廬

苦雨擬張協

玄雲駐夕景層陰蔽晨光  
祁祁貫炎序萋萋迫金  
商綠苔積基階亭霞絢  
堂皇修途爲滄淵高丘亦  
洄襄翔禽止叢薄幽林紛  
萎黃索居淹晨暮感時  
令神愴不惜蕙花歇所嗟  
蕭艾長徙倚望天路佇  
立瞻秋陽

贈內

良時飭徒御予當遠行游  
上堂戀慈親入室語好  
述王臣奉時役不得顧晨  
羞井臼有常分薄終義  
所尤攜手再三嘆出門悵  
悠悠室中四五雛眷眷  
不能畱遠期在終歲忽往  
爲三秋念我同衾子兀  
兀紛離憂離憂多苦辛心  
轉如車輪煌煌衆星列  
迢遙隔參辰魼魼雙鯉魚  
一浮而一沉楚橘不北  
徙越禽有南音贈子明明  
鏡可以鑒我心

明月照高樓徘徊在林木  
秋風振原野零露生庭  
綠蟋蟀鳴壁間嗷嗷逝華  
屋四顧何蕭蕭感此景  
光促念爾不能寐振衣起  
躑躅別易歲月長會阻  
百憂續猗猗蘭芷芳欲采  
隔河洲團團桂花樹何

以結綢繆南山有轉轂易水有方舟中情信繾綣  
會合當自由

內荅

昔與君別者乃在舍東溪溪水載君舟妾心行復  
如君行日以遠溪水逝不返賤妾守空閨坐惜歲  
華晚憂來陟高山長嘆望所思人生不滿百三載  
爲湏臾白露萎蔓草焉得長盛滋浮雲出山谷漫  
漫無前期願爲雙鴻鴈喋影戲清池不願爲飛龍  
矯矯眇天逵

感君明明鏡團團若秋月妾心良不虧君意有盈  
缺憂思亂心目攬鏡如沉灰何當奉膏沐拂拭生  
榮輝君子敦素心不以新故衰豈無桃李芳俯瞻  
園中葵豈無羅紵輕被服故所衣豈無梁肉貴采  
掇故山薇君諒秉高節賤妾空踟躕

送倫彥式司成

高皇締洪業濬哲肇人文敷命浹遐宇稽古登疇  
英崇崇辟雍建奕奕覺居新鍾山貢龍景鷄阜翔  
瑤林圓流協天造丙舍若雲憑巖彼淮水流湯湯

周其陰執言憲黃髮委佩趨青衿八方文軌輳萬  
葉黃彛振 陛下念祖烈踵武侔周成三宮聖帝  
則四圭流德明成人肆無斃洪化昭若神於赫文  
武圖莫茲豐鎬京峩峩髦士宜雖雖飛鳳鳴選德  
握化紀眷子爲國禎奕世獎休懿操翰侍明庭煌  
煌帝命將肅肅南轅征旌佩豈云遙俎豆由茲陳  
黃鍾宰殊叩衆流會有盈衣冠示民則羽衣章國  
經濟濟橋門聽温藻敷丘墳蹉蹉國子徒率履有  
儀刑式謝何晏辭亦陋桓生榮采萍遲鳴鹿飛鴉

集嘉林聲光自南國大雅流餘音

春遊懷友人

淹愁謝冠蓋耽寂懷丘林言與二三子薄遊向城  
隄習習谷風變嚶嚶黃鳥鳴弱草有嘉意流泉動  
春聲俯鏡潛魚躍仰睇故條榮乘時鮮陋質被野  
多鮮英觸景豈靡諧感舊情所欽物理互云代人  
事無終傾達人順元化游心付沉冥

霸陵篇

憶昔漢文帝行游霸上園遙指新豐道回瞻渭水

原倚歌未終曲慷慨啟長嘆  
柳發北山石紵絮斯  
其間左右相噉嗟  
番夫前致言請觀秦皇帝壯哉  
營鄴山白日避層闕  
銀流涸重淵立臺玉衡建幽  
阡青黎懸六宮既同盡  
千夫亦何冤金湯萬年固  
陵谷須臾遷愚民諒何知  
厚葬乃其愆片言感宸  
極納諫如轉圜高陵不夷  
塹卑渠瀉通泉聊供陶  
冶器無改山澤觀當年  
景遺詔後世稱高賢  
魏魏霸陵廟迢迢至今安

送董子元南歸兼訊袁允承之

董生鸞鳳質儀羽何繽紛  
二十作文賦麗藻師機  
雲投策羨賈誼懷繻陋  
終軍躑躑四方志而不緜  
世氛白駒謝空谷鳥鳴懷  
高枝來賓覲王國整駕  
竢天逵致我故友問贈我  
瓊瑤辭英英縷文玉粲  
粲呈明珠盍簪金石叩儷  
奏墳麓俱北轍始停轍  
南江理歸柁商風協悲端  
登高不能別蕭蕭江漢  
秋悽悽霜露結憑君訊  
袁安應臥丘中雪援琴奏  
陽春疇能變寒節



七言古詩

高陽行

菁山先生謫傳保定保定古高陽也于是  
門人屠應竣爲作高陽行

君不見高陽酒徒氣若虹酒酣仗劍謁沛公褒衣  
側注反遭罵豎儒瞋目稱而翁軍門拾謁使者入  
麾矛雪足來趨風儒冠自昔爲人下豪士纍纍走  
中野公卿半屬鼓刀人塵埃誰是彈冠者侯門我  
我仁義存金貂白玉多殊恩九達車馬若霆擊中

臺咳吐如春溫丈夫風雲不自致寧能呶嘍齷齪  
趨華軒菁山先生真崛竒文章垂世光陸離懸黎  
結瑤世莫識陽春白雪和者誰憶昔予爲門下士  
諸子森森並蘭峙白晝行歌秦駐雲醉後清心越  
溪水卽今已及十年餘人事升沉豈堪紀鳳儀未  
上金門書呂甥尚曳東郭履逢也雖負鴻漸翼失  
勢青雲未能舉去年有詔收駿骨沈咸十蹶始一  
起先生豈是百里才驥伏鹽車垂兩耳幾年臥遊  
湘水東洞庭雲夢清若空青蠅營營止叢棘白露  
颼颼摧孤桐長安春半氣猶烈上林木冰柳條折  
潞水方舟不得行匹馬蕭蕭踐冰雪高陽客舍行  
人疎糜珠斧桂爲晨舖天寒苜蓿芽未茁夜深颼  
颼時相呼鵠袍諸生半僵臥玉署談經能聽無君  
不見黃金峩峩千尺臺昭王樂毅俱蒿萊漸離擊  
筑已絕響荆卿易水歌空哀吁嗟乎人生得失何  
須數尊前俛仰成今古時來北關繫金魚歸去南  
山射猛虎

祥麟篇贈陳太史館長

祥麟墮地氣已振虎豹辟易百獸馴明珠出水光  
猶濕置之朗然來照人仲冬十日日初沒東方熒  
熒半明月我時走馬尋酒徒恠君意態何恍惚冠  
欹履蹶不受謁室中燈燭隱復張雲霧氤氳飛北  
堂君行揖客猶倒裳但聞有物啼嗶嗶鳳雛在巢  
文錦藏龍鱗藉沫翟瑜光看君蘭芬兒蕙質炯若  
寒冰映瓊室令我未見已心失丈夫生兒百不憂  
桑弓蓬矢志遠游長大射獵青海頭我先解贈雙  
吳鈎終童棄繻何足羨班生投筆會封侯

君不見見贈錢汝載

君不見見驂騑自負千里足蹴踏鹽車猶噴玉櫪下  
駑駘飽芻粟古來達士多賤貧高文瑰瓊能誤身  
姑蘇錢郎三十餘去年獻賦承明廬爭傳綺麗似  
相如今年宰邑向山郭束帶逢人氣蕭索雲峯合  
沓洪峒孤石瀨潺湲合江閣山水蕭蕭亦堪樂落  
魄寧受簿書縛我觴勸君君莫嗟誦君秀句凌層  
霞左持干將右鑊鈇東游青海西流沙二言秋風  
錢作會振雲中鳥春城不種河陽花此去若逢勾漏令

爲予長揖問丹砂

壽兄歌

蓬萊之曲仙人居金函玉訣藏立書當湖如空曉  
雲沒望中宮闕開璠璣我兄昔抱滄洲趣投簪未  
老棲煙霧濯足還從天漢源挂衣却向扶桑樹鸞  
歸丹穴龍在淵清芬海內令人傳層冰泠泠映秋  
月寒松漠漠凌紫煙吾家世上當湖里奕葉衣冠  
蔭喬梓鴛鴦時看郎吏衣星辰晝聽尚書履伯父  
英英三一翁雛生三鳳鳴梧桐仲兄雖逝伯也奮

中朝烈烈推英風我兄獻賦長楊畢 天子爲歡

親造滕峩冠飛豸立螭頭白簡搖霜照雲日有時  
啣命下星廬南觀百粵西青徐山川歷歷迎龍勅  
蛟鱓嗾嗾避隼旟人生富貴如朝槿懷忠磊落摧  
孤憤三徑猶存湖水清急流自昔推高隱小弟金  
門乞省回况逢初度薦霞杯親瞻壽域開東海爲  
愛星文接上台鶴鴒無聲秋色淨鴻雁澄江影相  
映田氏荆花正好顏謝家池草爭傳詠彩衣聯翩  
趨玳筵又看玉樹臨風前填箎未奏南山曲琴瑟

先調棠棣篇

西虹草堂歌

南畿自古稱佳麗萬戶烟花開甲第臺城日上飛  
紫霞鍾山天虛浮王氣高皇垂統建大都龍蟠  
虎踞開皇圖金闕直從中極見朱樓上與浮雲俱  
吳宮蕭蕭暮煙起三閣豪華已凋弊鷓鴣秋高霜  
氣寒盧龍月冷波聲細君不見淮水橋邊石鳴瀨  
萬雉爲屏水爲帶百丈虹垂西極前五緯光騰紫  
清外草堂縹緲枕絕壁樓臺半映羣峯出五雲煥

耀歸鳳林九霞燦爛來龍窟萬里天迴嶽樹晴大  
江湖落渚沙青滄洲日暮風浪靜倒影獨照虛堂  
明堂深地迥人莫到石房孤懸蘿裊裊幽室寒蟬  
倚日鳴紫蘅碧杜含煙笑龍門有史名山藏茂陵  
獻賦通明光風生螭陛搖簪筆日暖蘭臺見鳳凰  
翩翩五馬來東郡漢家循吏今堪並赤羽朱旛海  
上行金函玉節台階近每凭郡閣望石城蕪葭露  
淨鴻雁鳴星臨北斗鄉關近木落南天江水明草  
堂已作多年別披圖把酒情偏切從君盡節報

清朝白首相攜臥煙月

武夷吟

送李侍御元陽按閩嘉靖丙申病中作

予年二十頗好奇志遊五嶽訪安期微官束縛歸  
未得往往按圖披武夷武夷山水誰爭長大王峯  
高九千丈鷲嶺泉飛赤鏡開鳥道紅垂紫霄上虎  
踞龍驤天際來千花寂寂照層臺陰崖時見靈仙  
度陽壑晴看日月迴一谿初疑路中斷九谿曲曲  
明如練幽巖欲瞑忽自開瑤草蓬丘望中變仙壇

鷄犬不復聞草樹猶含五色文朝光下見滄溟日  
暮影遙連越雋雲我欲從師問真訣飛心已寄空  
山月玉女峯頭授錦符曾孫笛裏吹晴雪李侯攬  
轡使八閩武夷仙人來作賓霜風不入桃源樹羽  
旆先行建水春憶昨石渠同侍日惟我與侯情最  
密十載同爲畫省郎九霄近奮螭頭筆螭頭白日  
下鸞書絳節行空萬里餘蛟鼉解避君王勅烏鵲  
爭隨御史車桓桓驄馬誰能及白簡風生氣山立  
碧海烽煙晝日清荒林豺虎清宵泣君侯壯志真

嶙峋况復昌時能致身鴻名會與山川久成功歸  
勒彝常新燕南柳花飛暮春欲拾瓊瑤懷遠人青  
雲交結盡奇士眼中冠蓋誰相親江生以躑躑古  
烈士逸氣凌嶒去天咫諸郎備妙思精入玄秋月  
娟娟照寒水飛鷹擊罷祥鸞騫薦書何日開華軒  
只今棟梁急文本古來桃李稱名門予病故人成  
契闊上書欲歸辭未達方朔金門自陸沉相如著  
書苦消渴幾欲乘風挾兩生武夷尋仙食紫蘅君  
侯炯炯雙瞳明他年亦見丹砂成予隨三子何所

作白首相携朝玉京

送林僉憲汝雨兵備潁州

虛庭落日明嘉林薰風吹我堂上琴故人言別赴  
河潁使我不覺生離心援琴欲奏商聲沉感時懷  
昔多哀音憶昔與君同侍輦奏書朝聞夕稱  
善扈聖親登太乙壇承恩數奉甘泉宴瀕臯雲  
雨各西東北風栗烈南飛鴻君度石梁看曉日予  
隨蘭省臥秋蓬故人才高人所羨飛藻如煙燁如  
電建節鸞臺日月懸橫經彤署星辰爛寒霜飛空

凌北堂三年入謁來明光此時正奏甘露至金莖  
不動天風香露乳聯珠瑩飛雪松雲晝開幕還結  
故人新自故鄉來應飽瑤華弄松月夜談坐聽填  
填雷擊霄碧玉翻空摧閉門共讀祥異志出門向  
人還語誰九達車馬朝來會共議明堂草書對近  
臣新冊定陵功常侍總承開府貴君不見人生得  
失難自量天道盛衰寧有常朱陽受節蘭蕙芳零  
露夕變蒹葭蒼時來立取封侯印老去猶爲執戟  
郎又不見披裘採薪登后車篋篋在御朱桐虛歲

歲南山叩哀角年年東觀著遺書君行梁臺度潁  
水梁苑莓莓夕煙起汴水微茫晝不流唯見邙原  
暮塵紫鳳城東山龍作盤萬年陵闕天南端黃  
河千曲淨迴練蒼崖百疊騫高鸞此中騎士俱羆  
虎故人有文兼有武嵩少雲生拂羽旂淮海風清  
雜鉦鼓煌煌絳節坐臨戎俎豆長垂鼎鉉功縱使  
沙場親校獵絕勝芸閣賦雕蟲

太乙壇歌

太乙壇高凌紫氛官中夜夜延神君金盤千尺瀉



朱露莖臺五色飛龍雲撞鍾鳴鼓邀百祥回旌駐  
蹕瞻景光石檢親封綠文闕河圖著紀赤符昌九  
華燈明列星爛八變樂終萬靈見至尊端笏禮中  
天北斗垂芒指前殿皇皇圭璧奠甘泉奕奕棲居  
通列仙侍祀獨有東方朔登歌新協李延年白茅  
授冊侯五利青鳥啣書作前使貝闕徘徊河漢沉  
絳節繽紛王母至武皇北面來相迎稽首至道聞  
要精能驅三尸鍊五魄可以閱世爲長生帝聞斯  
言再拜受宴罷言歸樂無有祈年何必汾水陰無

爲自享南山壽

贈張叅軍

早向錦城擒黠■壯從天將斬■四十謁帝  
白獸闈五十腰懸金鯉魚男兒賭命報■主昨  
日雲中馳羽書

送同年唐子鎮削籍還雪川歌

雪川之水清且閒五湖映帶流其間草堂突兀在  
何許九畹有蘭山有芷銅官峯高當坐隅金沙泉  
落青天孤熊羆咆吼向空立魑魅窈窕窺人趨君

有匣中三尺劍提攜欲獻明光殿  
今皇高築黃  
金臺銅龍雙嘶聞闔開治安要策至尊喜年少今  
看賈誼才貫城星高隣帝垣紫芒夜耿層霄寒白  
雲幽暑春日淨空庭古栢雲盤盤山鬼宵行倚金  
穴姮娥飛奔入明月五侯七貴多 帝親玉樓椒  
閣香氤氳殺人誰敢問姓名但見白馬垂朱纓罷  
虎桓桓守金關抗疏叩闈身首裂誰能天上犯龍  
顏君倚赤心干日月天王覽奏意允之左右竊視  
相戲吁作書走報梁竇恐百計回天天欲動九重

震怒禍莫測金鼎紅爐燎飛翼宰臣力救天解顏  
萬里生還偶然得潞河邊頭飄柳花平江落日明  
蒹葭山猿夾岸喚行客妖魚射人吹暮沙三山扞  
潮江若旋輕舟脫險如疾箭薰風習習吹香薇南  
雲片片傍魚磯歸時正值荷花發荷葉翻翻好製  
衣荷衣夜寒秋露急江行蕭蕭淨秋色逐臣此時  
應嘆息人生富貴豈終極丈夫要在能死職君不  
見蒲田林尚書一言不合歸故閭又不見四明楊  
給事朝侍金門暮田里朝廷不可無直臣法行始

竟天王尊麒麟在山豺虎伏狐兔豈敢窺車轅我  
歌送君君鼓缶相看各盡盃中酒君歸且臥白雲  
間紫詔盤龍伴賜環

送友人之蒼梧

朔風蕭蕭雪作花曉月半壁浮銀沙清輝可贈不  
可掬瓊瑤散漫隨行車上林柳條寒未茁五嶺梅  
花春正賒蒼梧煙煖夜成霧潯陽水明朝絢霞岐  
路向君稽首別遙緘椒醕訊重華

送郭寅仲節推太原

郭生三十佐雄郡馳車都門向三晉太行迴颯天  
際來千里崔嵬作名鎮五臺雲氣仙人家雙旌迢  
遞拂層霞天池漠漠冰爲鏡雲樹蕭蕭雪作花春  
色欲回邊地草春風先繞使君車汾河簫鼓朝行  
縣錦閣琴尊晚散衙唐風陵夷久不作良士瞿瞿  
戒荒樂保障由來異蠶絲利刃今看試盤錯

送院長華二子潛歸覲

江南景色漸芳菲遊子况從天上歸遲日分暉聯  
棣萼高雲流采貯庭闈金馬蕭蕭玉堂客紫鳳啣

羣下南國山川行處有光輝  
閭里相看俱嘆息  
攀帶承恩白玉新  
萊衣細蹙金麒麟  
文魚旋向蛟冰躍  
烏鳥偏啼綺閣春  
芝蘭芬馥桑榆景  
墳麓遞奏瑤臺迥  
嘉賓總是漸  
達鴻珍筵  
賜出仙調鼎  
惠泉釀酒  
三農南山獻壽樂  
無窮但使白華明  
永晝肯將靡盬

贈吳山人擴

山人出山何所適  
來作長安五侯客  
打漁朝飛北海雲  
磨崖夜泣南山石  
長安二月花  
滿煙意氣翩

翩俠少年千場博  
戲章臺下百發烏  
號細柳前山人  
敝衣衣後穿拾  
謁欲向何人憐  
投珠委玉盈尺  
箋饑來不售囊  
中錢短歌爲君  
君自慰且拂琅  
牙謝時貴王生  
解襪只自唾世  
間那有張廷尉

馬上贈武舉生金寶

金寶以歲庚辰舉武試時學士石公珩爲  
考官今廿年餘矣猶以敝衣走風塵中兵  
憲陳君令護予行予憫之爲賦長句

翩翩飛騎突且雄  
橐垂七尺高麗弓  
向予長跪馳

素封來自天津陳長公感君來緘重君使汝才且  
雄者誰子云是熊峯門下士緋衣以隨塵土緇壯  
心尚逐風雲起長公好士輕黃金求才不憚幽與  
深幕下立談收劇孟坐中飛檄佇陳琳白髮自知  
無長物青商猶自有哀音我聞其言感且嘆古來  
相士輕貧賤驕驕豈少伯樂無世上紛紛寧足羨  
曾冰皚皚黃河枯旄頭西指宮城一策勳報恩真  
丈夫插貂橫玉盈上都封侯之骨汝有無贈汝腰  
間金僕姑

至日憇東平飲趙二元實舍席上贈長句

四明才人趙元實絕壁寒松倚蕭瑟逸興飛翻東  
海雲赤心直指扶桑目前年 天子罷郊雍金書

煌煌命上公秉圭植壁對 上帝奉璋錫胙俱宗

工諫臣如麻但僵臥君獨抗言陳不可批龍巴荷  
明主慈履虎真逢貴臣怒去年過飲倪生家夜深  
酒半人爭譁仰天白眼罵流輩嚼盃膝席陵豪華  
人言趙郎太孤立委心置人人不識徒手欲裂丞  
相麻直腰不共將軍揖坐令談笑生戈矛白玉被

點黃金投鷓鴣一枝聊自適騏驥當途遂晚收我  
來山郭逢長至晤語相歡故人意墨綬猶存粉署  
香鑄宴曾霑赤墀賜自從天上聽簫韶歸向人間  
厭歌吹卽今束縛如拘囚青山對面不得遊尊酒  
豈能容傲吏冠帶時催見督郵落魄但知爲善樂  
簿書兀兀使人愁尊前起舞歌向君人生得失如  
車輪君不見其羅孺兒能貴秦買臣四十行負薪  
又不見田郎一言取相印馮唐十年官不進天道  
陰晴難豫期物情反覆那須論我今已與滄溟期  
君才不久蓬蒿居盛世豈應無狗監是誰能薦馬  
相如

歌風臺

漢皇昔日還沛中四海爲家憶故宮沛中父老獻  
牛酒爭識當時隆準公咸陽官中鹿爲馬芒碭山  
上蛇成龍子弟遞進鳴歌鍾酒半泱泱歌大風湯  
沐之邑恩澤隆千秋萬歲樂無窮人生悲樂須臾  
改猛士之思復誰在韓彭已醢英布誅遺令猶令  
檻樊噲古來豪傑總堪悲沛水東流西日微歲歲

山川猶故色風雲不向沛公飛

上之回

上之回乘六龍龍文五色雲九重參駕日月前飛  
虹逐■蕭關道祀帝甘泉宮別館迢迢與天通屬  
車絡繹渭橋東翻翻豹尾翔煙空瑤池終燕歌秋  
風歸來萬歲樂無窮

五言律詩

贈傅封君時封君在京師與其子給事學禮  
同陞謝

之子登青瑣封章下

紫房拜恩同禮數侍從有

輝光世濟衣冠盛朝分劍珮行過庭論諫草持以  
報君王

送閻公甫太守赴保定

五馬春日光言赴古高陽關臨紫荆險水繞白溝  
長政事日多暇風流君未央如過樂毅廟爲一拜

王

雪後高子業約登毘盧閣不赴

都門一夜雪春半尚封條柳色祇全未梅花應共  
飄登高看霽景良友暮相邀立馬嚴城迥非關剡  
水遙

寄內弟黃韶孚

吾憐黃叔度雅興迥難羣俊朗三秋月孤高永夜  
雲爲文無近體對酒卽微醺一自楓橋別清談不  
易聞

夜

披襟散塵慮永夜一行歌明月滿金闕晴天闕玉  
河清心雙鶴唳適意片雲過本欲懷歸隱其如良  
夜何

送陳約之謁祀 孝陵三首

漢帝郊雍日祀官拜鼎湖山川縈紫氣龍虎閱黃  
圖雲擁金輿寂天橫寶殿孤岐豐根本地千載見  
文謨

萬歲橋山路三春草木青乾坤黃鉞在風雨翠華



屬北極通羣帝中天覲百靈當時貔虎佐一一扈  
青冥

爾作朝陵使春風絳節催別離頻駐馬相憶更登  
臺氣色蓬萊迴江山寢殿開甘泉歸奏賦遙羨子  
雲才

夏日  
捷至奉寄總制唐相公三首

安危繫中原節鎮雄 君王親授鉞相國坐  
臨戎瀚海軍麾動狼山轉戰空遙聞六月頌不數  
太原功

騎窺秦塞宗臣出漢疆長驅龍厩馬百戰虎賁  
郎策授天人秘營連象緯光何當窮絕漠臨  
王

萬里塞雲黃秋風 馬強將軍屯細柳 天子射  
長楊戈劒明朝日旌旗拂夜霜 業盛麟閣  
有輝光

送陳給事使琉球三首

絕域 天王使三年諫省郎星辰傳鳳詔冠冕授  
蠻王蜃氣鴻濛合潮聲日夜長錦帆滄海上南望

有輝光

南荒饒霧雨窮島接風濤下瀨樓船迴馳封使者  
勞夷官趨弁服海色照麟袍若道唐虞際應瞻日  
月高

帝遣辭青瑣乾坤屬壯遊九霄持漢節萬里赴炎  
洲日抱蛟龍躍天函島嶼浮遙憐張博望銀渚問  
牽牛

寄題孫氏園亭次馬編修韻

地選三吳勝池通碧海波紫鸞棲澗竹黃鶴舞煙

蘿谷暝雲霞合山空夜月多憐君真豹隱吾亦問  
漁簑

聞道洪崖子相邀江上山潮觀滄海盡林臥白雲  
閒爲圃滋瑤艸還丹駐玉顏蕭然天路隔逸駕迴  
難攀

不待金門詔遙從水竹居地憐三島近人是上皇  
餘苦栢堪爲飯名山好著書興來還把釣不是羨  
淵魚

秋日宴馬都尉第

爲識天人貴雲中別館開聞簫度鸞曲觴客在瑤  
臺飛閣秋光入層城紫氣來月林歸騎擁疑傍鵲  
橋迴

訪念上人 不遇 留贈

龍象經行地飄飄何處山相看石林晚高雲猶未  
還焚香瞑坐久落月道心閒永願離人世從君來  
閉關

送同年謝子儒致仕歸蜀

畫省爲郎早飄然遂拂衣孤雲度秦隴萬里赴庭

闈迴馭心元切題橋願不違林泉獨往地黑髮似  
君稀

子貞棲谷口潘岳賦閒居長揖辭明主爲農返故  
廬雪消巴嶺出天入錦江虛莫待楊雄老潛夫早  
著書

春日謝人惠扇

眷情遺寶箴延握近朱暉啟笥涼風動披襟滿月  
輝光搖霜繭細彩散蜀雲飛虞薰如有奏流吹助  
音徽

秋日城樓餞王主事時魁

此日登樓別長懷粲也文隨風望征蓋聽雁惜離  
羣露零山桂碧日斜江草曛因君動歸思遙寄越  
溪雲

夜遊城西寺懷陳編修約之王吏部道思

徙倚珠林晚停盃憶往年臨風雙玉樹望月倚金  
天棄繻終生少投沙賈傳賢漢廷誰復似萬一  
聖君憐

趙武庫元實移居賦得堂字

高士便疎曠居臨御苑傍開尊秋月滿列樹夏  
雲涼水鏡搖朱戶風琴奏石房登樓新有賦王粲  
謝登堂

駕詣南郊

華蓋團闐闔勾陳肅羽旄雲披丹鳳闕日抱袞龍  
袍萬乘嚴柴望千官走輦髦景光霄燭處遙識  
慈宮高

禁兵嚴複道警蹕下瑤臺星隨千騎列香似九天  
來行殿神仙候靈編海嶽開懸知受釐日還訪

賈生才

大■門候駕

琳觀齊龍軌前驅闢鳳城天旋黃道迥路入紫霄  
平韶樂傳空下鸞旂拂露輕年年承帝貺端拱  
育羣生

九重移寶幄萬騎發甘泉大輅風雷翊華旌日月  
懸鳴珂隨廣樂瑞氣引爐煙鴛鴦瞻霄漢 龍光  
玉几前

西園

卜隱西園勝虛堂引夕暉溪行明月伴林坐白雲  
圍震澤秋光接金庭野色微鶴鳴霄露薄涼入薜  
蘿衣

甘露寺次韻

甘露千年寺羣公攬轡過樓空吳楚盡江闊雨雪  
多蜃氣連蒼海琳宮隱碧蘿苦聞幽絕處白日走  
鼉鼉

戚懷王輓歌四首應 制

暫輟溫明殿長局永夜臺緱山空悵望 帝子不

歸來喚鶴驚華表，懸藜度劫灰。彭殤同幻世，莊理謝深哀。

崑府璫璵並金枝，棣萼分中宵。沉寶氣一幹委流雲，綠字題仙籍。龍光闕冊文，岐嶷應不昧。留戀奉吾君。

西嶺曙光微，行歌薤露晞。珠從仙掌墮，莫忽舜階飛。劔舄光玄壤，衣冠奉素幃。春回邊草綠，不共少王歸。

十月西陵道，陰風淒以寒。轎軒猶列戟，香嶺罷鳴鑾。雲臥珠衣寂，山迴寢殿安。千官同灑淚，寧啻魯人觀。

送唐生

杖策欲誰親，侯門不禮賓。空彈馮氏鋏，莫救范曄貧。玉露凋紅樹，金風起白蘋。蕭蕭南去雁，飄泊自爲鄰。

宿唐安禪林

北關初辭綬，西林來閉關。無營千劫遣，因病一身閒。初月寒逾迥，孤雲晚自還。不須長面壁，出郭是

青山

道雪

回風吹急雪積素滿平沙獨憶趨朝日人攜滿袖  
花窺淵迷曉鷺啄屋有饑鴉欲趁樵夫徑尋煙過  
酒家

同雲凝朔野浮月湧銀沙照影疑無地翻空只有  
花山山俱種玉樹樹欲沉鴉却恐袁安臥時尋野  
外家

寄胡太常經

憶昔從南狩陪君接鷺行瞻依天咫尺旬日路荆  
襄羽仗中宵合龍雲五色光清卿今已貴不是舊  
馮唐

七言律詩

春陰

二月之交愁太陰野雲寒日轉蕭森西山白雪朝  
含凍朔塞浮煙晚正深苦見梅花思故里忽聽鴻  
雁損春心簿書鬱鬱仍多病對酒聊爲莊鳥吟

花朝後雪柬友

昨日花朝花未開陰陰朔氣滿燕臺夜深月向榆  
關沒天際雲當碣石來湖海積冰龍盡立河山飛  
雪雁重回虛堂寂寞難乘興憶爾陽春和寡才



漫興

南風吹晝沙霧黃遠在燕臺思故鄉火雲炎日暑  
三伏江檻野亭天一方卽愁蠅聲惱饒睡况有客  
子來相妨行歌抵暮遲明月栢林露葉鱗鱗光

鏡光閣雨

鏡光閣在 帝城邊遙控西山奠北川忽有風雲  
來絕塞坐看雷雨下諸天微茫野色俱堪回潏沆  
中流好放船東下林塘更幽絕江南秋望此依然  
雨晴又作

琳宮飛閣 先朝建望遠憑高思不羣倚檻風煙  
千里霽行空日月二儀分南來御氣通金闕北去  
羣山擁塞雲寂寂四天開法鏡夜深光彩動星文  
駕詣 泰神殿禮成屬雪至

中天奕奕迴神居 聖王明禋出近畿璧月乍臨  
雙闕永瑤華旋繞六龍飛光迎御氣浮仙仗色晃  
重雲覆羽旂共喜俊髦陪顯相時從清切迓天威  
琳宮新闢故郊前我 后齋心格上玄夜貺景光  
團御幄曉看靈雪舞鈞天神仙自捧靈符闕法象

遙瞻帝座懸不向甘泉論漢禮還占神鼎過周年

伏日移居

紆徑堂開亦自幽况逢晴日俯林丘緣崖蘿薜娟  
娟淨倚郭雲霞黯黯浮幸有樓居堪避暑卽妨叢  
木易悲秋憑高轉極鄉關望病眼微茫潞水流

春晚過諸一丈留贈

春堂背郭覆春雲郭外西山對夕曛開徑日淹高  
士駕閉門時草太玄文江南共憶梅花發北地愁

聞鴻雁羣愛我爲留徐孺榻欲將仙訣問茅君諸君

素好談  
仙故云

寄趙景仁是日適有邊報

朔氣陰陰晝不分逐臣消息苦難真幾時定卜空  
同室盡日遙瞻太白雲三鎮尚淹秦戍士五原重  
下軍愁心萬里隨天遣爲折梅花一寄君

喜雨次韻

高雲片片晴逾熾急雨冥冥暮始來卽有涼飈生  
海嶽驚看瀑布下樓臺江村雷電虛偏壯夜壑蛟

龍勢未迴病起喜看生色異郡齋原有作霖才

聞南太廟災

金陵自昔建皇輿太室中天烈祖居聞道震  
雷三伏後遂令煨燼百年餘朱旂寶鉞空人世玉  
冊金輪返太虛帝遣稜祥憂聖主諸臣應有諫  
彤書

皇祖開基立闕宮萬年宗祀兩京同南天寶錄歸  
空象列聖英靈御赤龍漢道罷遊原廟主黃軒  
重失鼎湖弓微臣北望情何極淚灑秋原向碧空

病起

山郭雨餘涼氣深更逢朝雨淨初林閒居忽漫開  
三徑臥病優遊戲五禽倚閣醉醺時遠眺沿溪秋  
晚稱孤吟獨從天末懷諸友遲爾嚶嚶黃鳥音  
東部爲園枕碧流羣峰合沓俯林丘村閒晝日驅  
黃犢客至晴溪散白鷗璧月近臨珠樹晚園近東禪寺  
銀河西指越山秋思立欲擬張平子臥病無心詠  
四愁

朝陵

本朝宮寢居庸北百二河山枕上都隧道陰陰連  
大漠金輿寂寂闕蓬壺天雷碣石爲華表水繞桑  
乾作鼎湖欲寫神功鐫嶧頌窮崖絕壁倚天孤  
經筵日值初度有述

紫宸朝下隨仙仗講殿晴臨敞御筵閣道星辰迴  
玉几層霄日月照瑤編霏霏絳霧爐煙合片片卿  
雲雉扇還此日侍臣沾鎬燕年年初度奉堯天

九日早登城樓

帝城樓閣俯煙空九日登臨曙色通仙掌日華浮

露白蓬萊霞氣建標紅諸天臺殿虛無裏百疊河  
山指顧中定是風光牽醉眼朔雲遼海望無窮

暮歸登西樓再賦

客思逢秋已自哀登樓強復當登臺寒烟晚共青  
林合朔氣初傳白雁來雲散夾城雙闕近月臨西  
嶺數屏開紫萸黃菊俱堪把落帽臨風更舉杯

病中柬張郎中臬

閉閣經時思悄然緣階芳草欲芊芊啼鶯日送千  
門曉宮樹晴含萬井煙東第綺羅淹白晝西園桃

李照芳年何時試共張京兆走馬章臺垂柳邊  
簡金侍御敷華訪密雲赤肚仙人

聞有仙人下紫庭欲從君去問長生夜眠冰澗魚  
爭躍行嘯山林鳥不驚在野但看雲冉冉御風時  
覺晝冥冥亦知畿甸乘驄貴爭似蓬萊跨鶴行

大駕朝陵

七陵晴望鬱崔嵬直北瑤光接斗回每歲祠官供  
伏臘祇今仙蹕覲蓬萊九天日抱龍旒轉萬壑雲  
蒸雉扇開聖孝卽看膺茂祉發祥先已叶高禴

駕幸西山

行宮迢遞接仙臺部外驂驪羽騎來山護皇輿千  
嶂合天臨宸極五雲開春雷翠柳供行轡香引繁  
花獻壽杯獨愧周南流滯者侍臣遙羨栢梁才

駕幸九龍池次韻

地轉龍池波渺渺天遊龍騎晝駢駢雲中影動金  
銀關鏡裏春浮日月旂瑞協舜河縈寶籙慶符周  
沼散靈輝巧隨帝幸供清樂故遣泉聲百道飛  
駕登十八道嶺次韻

宸遊十八層雲嶺駕轉飛龍第一盤雲擁霓旌屯  
萬騎花明黼帳引千官簫韶聲奏鈞天樂河洛圖  
開五嶽壇卽擬岡陵同 聖壽更看滄海淨重瀾

遊城東觀

病起尋遊強杖藜琳宮寂寂枕迴溪繁花向日俱  
宜笑幽鳥逢春各異啼雲滿客衣庭樹合氣薰山  
酌芷蘭齊郊行亦有桃源在明日重來路不迷

寄張揮使淮

將軍投老罷臨戎別業初開勝郡東松下拂霜看

寶劍花間遲月引雕弓秋風羽獵愁無地春水樓  
船若在空中郭外蕭蕭多暇景賓筵日日駐文雄

題張學士仰宸樓

宸章奕奕開南極雲閣暈暈控上游鳳藻龍光迴  
紫笈金繩玉牒隱丹丘星河入座天文麗湖嶽當  
窓御氣浮萬卷鄴侯真不數春風遙並曲江樓

奉和嚴相公居守京城巡門作

九重仙駕御秋風百疊河山映遠空鎖鑰暫移黃  
閣下幾衡只在紫微中思文日日昭皇略嚴警時

時簡 帝衷關內獨留嚴相國不教遠數漢臣功  
鬱鬱西陵寢殿重 乘輿秋祀指離宮風傳虎旅  
三千合天遶秦關百二雄冉冉絳煙隨幄次嗶嗶  
仙樂下雲中經綸每捧明公作侍從慚無一字功

送蘇侍御謫宦灤州

三旬簪筆倍 恩暉十載郎官與世違霜動栢臺  
蒼隼擊秋高灤水落鴻飛謬隨鳴馬辭天仗欲繪  
雲龍緝袞衣岐路蕭條何所贈朔風涼月思依依

燕邵氏園亭賦贈

邵名輔 太皇后姪能文好賓客

舊家恩澤最知名 賜第原經將作營庭戟畫虛  
懸薜荔渚蘭秋馥藉葱珩堂中賓客時投轄幕下  
兒童解請纓底事避喧辭世賞却從方士學長生  
王侍御瑛招登崇文城樓有作

裁得登臨已絕塵青山歷歷向遊人中天樓闕光  
分映萬戶煙花晚更新雲起諸陵俱五色月臨華  
沼漾重輪不妨日日陪高會坐倚層霄奉玉宸

齋宿院署

城上旌旗接建章晚來鍾鼓動昭陽紫雲遙映三  
台色明月高涵萬象光袞職趨蹕瞻蕊祀齋心立  
漠臥焚香腐儒謬廁金閨籍仙侶相看瓊樹芳  
朝廷典禮崇元祀 制命傳宣下五雲仙館地閒  
丹禁接帝城春暖絳煙分花間遲日開書卷松下  
清齋共鶴羣遙憶 玉泉諸扈從歸時應獻長卿文

登太白樓

當時不見謫仙人城上高樓空復春勢極中原臨  
岱嶽境非吾土異三秦遙憐避地東方朔生有相

知賀季真斗酒狂歌自今古志存刪述與誰論

寄呂水部

水部清閒屬上才晴沙煙舫畫圖開江淮萬里浮  
空下吳楚羣峰湧坐來貢賦卽今通北極 王官  
每歲出中台自公退食應多暇明月題詩謝眺臺

渡江望金陵與盧職方同賦

滾滾長江接太空登高望遠思無窮春潮自繞三  
山外形勢遙盤紫極中萬里乾坤異南北中流日  
月耀西東天邊銀漢何如此使節星槎或可通



曉發移封過飲張戶曹官舍

春日雨餘煙霧輕香飄画省自分明當階颺颺松  
千尺對客時時鸞一鳴白晝簿書無底事長淮風  
日有餘清琴尊正好催征棹回首南天一愴情

奉和宗伯嚴相公元旦 賜光祿酒饌恭紀

一首併次來韻

青陽御曆啟芳辰紫殿頒 恩及禮臣煖挹上尊  
春共到香傳神鼎氣猶新登嘉定効南山祝斟酌  
懸知北斗均鎬燕汾歌俱往迹爭如元日被 皇

仁

再賀嚴相公 詔賜直廬有作次韻

台垣奕奕紫庭西地近蓬萊瑞色齊雙觀月臨鳩  
鵲迴五樓春見鳳凰樓層霄夜永傳仙漏中使時  
臨捧御題爲識履聲天上聽錦袍猶有異香携

春日過瀛海公第有感

千家樓閣映朱軒猶見沙堤接禁垣有劍只慚吳  
季子無人重過趙平原花明戟戶春常寂鳥識雕  
楹晝自誼試看五侯歌舞地玉臺金埒鎖黃昏

懷趙景仁唐應德二翰長

玉樹金標兩少年紫廷親侍 聖人前歸臥故山  
今幾歲著書立室動盈編蘭生幽谷元同馥驥失  
青雲只自憐郢曲陽春知寡和何因重得奉朱絃  
夜懷趙二元實

雨過西峰疎積陰朔風南雁有離音幽居不爲交  
遊寡直道翻令感愴深手炷微香清獨夜坐隨流  
水徙前林鴛湖秋水澄如練倘共巢由一洗心

贈松江黃節推協恭

使君高雅更能文佐郡風流世共聞官闕夜延三  
泖月訟庭朝對九峰雲及門盡是文鴻侶飛蓋行  
聯振鷺羣爲道漢庭徵拜急暫時江左借餘芬

夏日送魏中丞巡撫河南

帝曰洛陽天地中河源嶽望九州通省方爲倚台  
臣重授鉞遙兼節鎮雄雙闕雲飛章並入三台霜  
白簡猶同不愁南國民多愠身領薰風出禁宮

晚宿禪林明日家兄同諸公携酒相別

寒宵刻漏傳清禁初日珠林散玉珂盛世乞歸

明主賜賓筵離思故人多雲山到處移簪紱鴻雁  
從今謝尉羅歸領春暉娛壽母并將花萼間笙歌  
晚憇東平劉中丞原清招飲不赴投贈短章  
義旗初淨楚江氛報國無家豈論勲三鎮擁旄古  
勝氣中臺執法應星文素書早歲傳黃石綠野新  
開臥白雲共道東山多景色獨隨卿月望氤氳

晚登嶧山

丹崖蒼壁出人間暝色空濛始到山親共白雲分  
石徑獨隨明月印松關風清遠壑鍾能度石鍾霜

冷孤桐鳳不還

嶧陽有孤桐

欲問秦碑何所處萬峯寥

寂水潺湲

投贈諸憲副楊伯

宦途擾擾駕難迴此老高風衆所推郭外一區惟  
舊業門前五柳不成栽諸曾爲尹爭誇佩玉趨朝早况  
是橫金出鎮來中外薄遊三十載只留孤月照霜  
臺

燕宗容姪湖上樓

十里澄湖接遠天飛樓百尺俯蒼煙雲山影落帆

檣外星漢宵懸几席前坐看陰晴俄異色醉憐花  
草各分妍莫將歌吹臨流發試聽龍吟或在淵  
一上層樓絕遠氛雨餘猶自氣氤氳煙中萬井明  
斜日天際羣峯歛夕雲霽景波光元並接林香爐  
馥細難分吾家小阮風流在河朔尊開客每醺

遊金澤寺

珠宮迢遞自前朝琪樹曇花半寂寥高閣凌空先  
見日半湖時湧暗通潮林間石丈吾當拜海上仙  
人坐可邀境僻不容塵客到却知人世有雲霄

三江東下水迴蜒選勝開山地不偏蜃海蒸雲常  
五色虹橋驅石已千年空林梵樂啼幽鳥沿浦樓  
居有画船寄語當時張季子不因鱸膾也應還  
寺中喜聞富憲副子超來訪

蒹葭秋水露將寒每憶幽人夜未闌行採紫芝來  
海上佇聞青雀艤江干風傳雲閣聽來雁香挹琴  
尊有佩蘭海內故交應不減相知白首似君難

秋夜望柳口

萬里煙波接素秋羣山歷歷俯中流瑤光不見蛟

官月勾景遙成蜃市樓水散五湖天共遠潮生東  
海地常浮乘桴不是清時願欲訪仙人在十洲

上元日立春有作

上元物色總輝輝詔律忻從霽景回寶炬撤明將  
臘盡銀花爭巧獻春開寒消璧玉光能麗氣轉銅  
龍漏自催却憶青陽稱萬壽標回北斗近天杯

太史屠漸山文集卷之一

終

